

Bil. 32

Rabu

9 Oktober 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KETIGA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Industri Tenusu Tempatan**
- *YB. Tuan Sivakumar Varatharaju Naidu (Batu Gajah)* [Halaman 1]
- **Pertanyaan Mengenai Dividen Lembaga Tabung Angkatan
Tentera (LTAT)**
- *YB. Dato' Dr. Noraini Ahmad (Parit Sulong)* [Halaman 4]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT KETIGA
Rabu, 9 Oktober 2019**

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Industri Tenusu Tempatan

2.34 ptg.

Tuan Sivakumar Varatharaju Naidu [Batu Gajah]: Terima kasih Tuan Yang di-Pertua dan terima kasih juga diucapkan kepada Yang Berhormat Timbalan Menteri Pertanian dan Industri Asas Tani kerana sudi datang menjawab pertanyaan saya.

Tuan Yang di-Pertua, adakah kerajaan komited dalam meningkatkan pengeluaran susu lembu segar negara terutamanya melalui penternak susu lembu segar tempatan yang diusahakan secara kecil-kecilan?

Kadar sara diri pengeluaran susu segar dalam negara hanyalah sekitar 62 peratus setakat tahun 2018 dan saya sedia maklum, usaha untuk meningkatkan pengeluaran susu segar giat dilakukan melalui Program Pembangunan Industri Tenusu Negara 2017. Walaupun Lembah Tenusu, Muadzam dan lembah tenusu yang lain dapat meningkatkan pengeluaran susu segar negara, kita tidak boleh terlepas pandang peranan yang dimainkan penternak lembu secara kecil-kecilan atau tradisional dalam meningkatkan ekonomi penduduk setempat.

Satu kajian juga telah dijalankan dengan kerjasama Koperasi Penternak Tenusu Negeri Perak Berhad mendapati '*mismatch*' di antara penternak susu lembu segar dan Pusat-pusat Pengumpulan Susu (PPS). Sebagai contoh, Pusat Pengumpulan Susu Parit hanya digunakan oleh lima penternak susu lembu sahaja dengan kuantiti lebih kurang 300 liter sehari.

Sekiranya Pusat Pengumpulan Susu dipindahkan ke Padang Ragut Siputeh, Perak di mana kesemua 14 penternak susu lembu sekitar Buntong, Menglembu, Batu Gajah dan Sungai

Terap dapat menghantar susu lembu segar masing-masing dan kuantitinya dijangka meningkat kepada 1,500 liter sehari. Masalah yang dihadapi oleh penternak berkaitan Pusat Pengumpulan Susu di Parit ialah jarak perjalanan yang jauh iaitu 24 kilometer sehala dari Padang Ragut Siputeh ke Pusat Pengumpulan Susu Parit, Perak. Lebih lama susu segar terdedah kepada suhu bilik, lebih banyak bakteria akan terkandung dalam susu dan ini akan menjejaskan kualiti susu segar.

Oleh kerana Pusat Pengumpulan Susu Parit didirikan di atas tanah swasta, pihak kerajaan terpaksa membayar sewa bulanan sebanyak RM5,000 di mana ia dapat dijimatkan sekiranya Pusat Pengumpulan Susu Parit dipindahkan ke bangunan baru di Padang Ragut Siputeh, Perak.

Di sini, saya ingin mencadangkan kepada kerajaan supaya satu Pusat Pengumpulan Susu dibina di Padang Ragut Siputeh, Perak dengan anggaran kos sebanyak RM80,000 manakala peralatan atau mesin pula sekitar RM350,000 atau untuk menjimatkan kos, mesin-mesin di Pusat Pengumpulan Susu Parit dipindahkan ke bangunan baru di Pusat Pengumpulan Susu Padang Ragut Siputeh, Perak. Sekian, terima kasih.

2.37 ptg.

Timbalan Menteri Pertanian dan Industri Asas Tani [Tuan Sim Tze Tzin]: Terima kasih Tuan Yang di-Pertua. Untuk makluman Yang Berhormat Batu Gajah, pembangunan industri tenusu secara holistik merupakan salah satu keutamaan Kementerian Pertanian dan Industri Asas Tani seperti dalam Halatuju MOA: Prioriti dan Strategi tahun 2019-2020.

Program Pembangunan Industri Tenusu Negara yang dilaksanakan adalah merangkumi aktiviti pembiakbakaan, tanaman makanan ternakan, transformasi usahawan tenusu dan peningkatan kualiti susu. Program ini mensasarkan tambahan pengeluaran susu negara sebanyak 20 juta liter untuk tempoh lima tahun sehingga tahun 2022. Projek rintis yang telah mula di Lembah Tenusu Muadzam yang melibatkan penternak-penternak dari negeri Pahang, Negeri Sembilan, Johor, Selangor dan Perak. Antara inisiatif yang telah dilaksanakan di bawah program ini adalah seperti berikut:

- (i) program pembiakbakaan baka tempatan, di mana sebanyak 200 ekor lembu baka *Sahiwal-Friesian* dibawa masuk bagi tujuan pembiakbakaan dan ditempatkan di Pusat Ternakan Haiwan, Ayer Hitam, Johor dan Institut Veterinar Malaysia, Kluang, Johor. Program ini dilaksanakan bagi memantapkan baka lembu tenusu tempatan seperti baka *Mafriwal* melalui kaedah pembiakbakaan dan pemilihan baka yang mempunyai prestasi pengeluaran susu yang tinggi;

- (ii) program transformasi usahawan berskala besar juga telah dilaksanakan dengan penyertaan daripada tujuh buah syarikat tenusu tempatan. Program ini telah membantu memperkukuhkan prestasi pengeluaran susu bagi usahawan tenusu di sepanjang rantai nilai industri dengan memperkenalkan insentif secara *reimbursement* yang telah diberikan kepada usahawan. Insentif yang diberikan adalah lembu tenusu dan tangki susu; dan
- (iii) program pembangunan tanaman rumput napier sebagai sumber bagi ternakan lembu tenusu bagi memastikan bekalan makanan mencukupi dan dapat dibekalkan secara berterusan dengan keluasan bertanam seluas 170 hektar.

Sehingga kini, terdapat seramai 764 penternak tenusu merangkumi 76 orang penternak komersial, 91 orang penternak semi komersial dan 597 orang penternak kecil melibatkan populasi lembu tenusu sebanyak 33,508 ekor di seluruh negara.

■1440

Pengeluaran susu segar bagi tahun 2017 adalah sebanyak 37.9 juta liter dan anggaran pengeluaran pada tahun 2018 adalah 40.4 juta liter dan tahap kadar sara diri (SSL) sebanyak 61.44 peratus. Selain itu, kerajaan juga menyediakan kursus pengurusan ternakan lembu tenusu serta pengendalian kualiti susu di ladang dan tempat pemprosesan bertujuan meningkatkan kefahaman dan kompetensi penternak tenusu.

Bagi menggalakkan golongan belia terlibat dalam sektor industri tenusu, Program Agropreneur Muda dan Program Latihan Kemahiran Pertanian Kebangsaan (PLKPK) dilaksanakan oleh kementerian.

Merujuk kepada cadangan Yang Berhormat untuk memindahkan operasi PPIT Parit, Perak ke Padang Ragut Siputeh, Perak melalui pembinaan Pusat Pengumpulan Susu, kerajaan menyambut baik cadangan tersebut. Walau bagaimanapun, sesebuah PPIT dibina di satu-satu lokasi bergantung pada taburan penternak dan mengambil kira aspek biosekuriti di lokasi tersebut. PPIT Parit dibangunkan untuk menyediakan perkhidmatan pengumpulan susu bagi kawasan penternak tenusu yang berdekatan dalam lingkungan lebih 20 kilometer termasuk Siputeh.

Untuk makluman, pada masa ini kerajaan tidak berhasrat untuk memindahkan PPIT Parit ke Padang Ragut Siputeh melalui justifikasi seperti berikut:

- (i) peruntukan kerajaan diutamakan ke atas projek-projek yang lebih mendesak dan kritikal;

- (ii) pemindahan mesin dan peralatan PPS PPIT Parit adalah kurang sesuai memandangkan peralatan tersebut tidak sesuai untuk dipindahkan dan akan melibatkan kos pemasangan yang tinggi, tidak berapa berbaloi lah ya; dan
- (iii) bangunan PPIT sedia ada di Parit, Perak tidak melibatkan apa-apa kos sewaan kepada kerajaan.

Walau bagaimanapun untuk Yang Berhormat Batu Gajah dan pengundi-pengundi di Batu Gajah, *we offer you some good alternative*. Walau bagaimanapun, bagi memenuhi permintaan penternak tenusu di sekitar Siputeh, kerajaan ingin mencadangkan dua langkah berikut:

- (i) gabungan penternak-koperasi membina fasiliti atau infrastruktur di lokasi yang bersesuaian dan menyediakan kemudahan sistem rantai sejuk (*cooling tank*) bagi membolehkan penternak menghantar susu ke lokasi tersebut dengan kos yang ditanggung oleh gabungan penternak-koperasi sepenuhnya; dan
- (ii) manakala kerajaan akan menyediakan perkhidmatan ujian kualiti susu dan penghantaran susu ke kilang pemprosesan.

Kedua-dua langkah ini mewujudkan situasi menang-menang antara kerajaan dan penternak di sekitar Siputeh. Sekian, terima kasih.

Pertanyaan Mengenai Dividen Lembaga Tabung Angkatan Tentera (LTAT)

2.43 ptg.

Dato' Dr. Noraini Ahmad [Parit Sulong]: Terima kasih Yang Berhormat Tuan Yang di-Pertua. Saya ingin merujuk kepada perkara di atas. Saya ingin mengemukakan satu usul berkenaan perkara tadbir kerajaan di bawah Peraturan Mesyuarat 17 kepada Yang Berhormat Menteri Pertahanan mengenai dividen Lembaga Tabung Angkatan Tentera. Saya ingin merekodkan ucapan terima kasih saya dan tahniah kepada Yang Berhormat Menteri kerana hadir sendiri untuk menjawab soalan di bawah usul ini dan juga masa-masa soalan ini dihantar, ianya dah *being taken over by event*. Jadi, saya ingin membaca apa yang saya ingin bertanya.

Pada bulan Mac yang lalu, Kementerian Pertahanan memaklumkan bahawa laporan kewangan penuh berhubung dividen Lembaga Tabung Angkatan Tentera (LTAT) yang dibentangkan pada Jun atau Julai ini. Namun sehingga kini, sehingga kini itu semasa ianya dihantar, pengumuman berkaitan dividen tersebut masih belum diperolehi.

Soalan saya, mengapakah masa yang diambil untuk mengaudit LTAT terlalu lama sedangkan saiz aset tabung LTAT adalah RM10 bilion pada akhir tahun 2017, lebih kecil jika dibandingkan dengan saiz RM840 bilion tabung KWSP dan RM279.2 bilion untuk PNB.

Soalan kedua, saya mohon penjelasan mengapakah aset-aset terbesar LTAT iaitu Boustead Holdings dan Affin Bank Berhad mengalami kejatuhan nilai saham tahun lalu? Apakah kemerosotan ini berlaku atas nilai pasaran semasa atau aset yang membelakangi pelaburan ataupun syarikat tersebut sebenarnya tidak produktif dan tiada nilai bagi tahun tersebut. Sekian, terima kasih.

2.45 ptg.

Menteri Pertahanan [Tuan Mohamad bin Sabu]: Tuan Yang di-Pertua, Lembaga Tabung Angkatan Tentera telah mendapatkan kelulusan Kementerian Kewangan untuk melanjutkan tempoh menyerahkan akaun 2018 kepada Jabatan Audit Negara sehingga 30 September 2019. Lanjutan masa ini diperlukan kerana menyediakan Akaun Kumpulan LTAT tertangguh apabila Jabatan Audit Negara meminta entiti di bawah LTAT iaitu PERHEBAT dan PERNAMA membuat pembetulan kepada akaun-akaun 2018 mereka.

Laporan kewangan LTAT bagi tahun berakhir 31 Disember 2018 telah dimuktamadkan pada akhir bulan September 2019. LTAT telah membuat pengumuman pencapaian kewangan tahun 2018 pada 30 September 2019 serta mengisytiharkan pembayaran dividen sebanyak 2 peratus.

Tuan Yang di-Pertua, bagi isu kejatuhan nilai saham Boustead Holdings dan Affin Bank Berhad seperti yang dibangkitkan oleh Yang Berhormat, suka saya jelaskan bahawa prestasi pasaran saham pada tahun 2018 terjejas diakibatkan dari konflik perdagangan di antara Amerika Syarikat dan negara China yang berlarutan. Kenaikan kadar faedah rizab persekutuan Amerika Syarikat, ketegangan geopolitik, harga minyak mentah yang turun naik serta kejatuhan nilai ringgit telah memberi impak negatif kepada harga saham di Bursa Sekuriti Malaysia yang turut memberi kesan kejatuhan ini. Saham Boustead Holdings Berhad dan Affin Bank Berhad juga terlibat.

Pada 31 Disember 2018, indeks komposit ditutup pada paras 1,690.58 mata, jatuh 7 peratus berbanding 1,817.97 mata yang dicatatkan pada 31 Disember 2017. Pada akhir tahun 2018, saham Boustead Holdings Berhad ditutup pada harga RM1.42 seunit, turun 50.8 peratus berbanding dengan RM2.89 seunit yang ditutup pada penghujung tahun 2017. Manakala saham Affin Bank Berhad pada akhir tahun 2018 pula ditutup pada harga RM2.26 seunit, turun 2.2 peratus berbanding RM2.31 seunit yang ditutup pada penghujung tahun 2017.

Kejatuhan harga saham syarikat-syarikat pelaburan ini menjejaskan nilai portfolio pelaburan LTAT serta turut dialami oleh pengurus-pengurus dana yang lain di negara ini. Boustead Holdings dan Affin Bank sentiasa meninjau peluang-peluang untuk menjana keuntungan yang maksimum bagi meningkatkan prestasi syarikat pada masa yang akan datang. Terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang esok, hari Khamis, 10 Oktober 2019.

[Kamar Khas ditangguhkan pada pukul 2.49 petang]